

四庫全書

史部

欽定四庫全書

唐大詔令集卷六十四

宋 宋敏求 編

大臣

鐵券

裴寂等恕死詔

賜護密國王子鐵券文

賜突騎施黑姓可汗鐵券文

賜懷化王那俱車臯施鐵券文

賜李納王武俊田悅鐵券文

賜安西管內黃燾官鐵券文

賜陳敬瑄鐵券文

賜韓建鐵券文

附屬籍

安康郡公襲譽聽合譜宗正詔

燕公藝賜姓上籍宗正詔

楚王威賜姓附屬籍詔

高開道賜姓上籍宗正詔

胡大恩賜姓屬宗正詔

許涼武昭王孫絳郡姑臧等四公子隸入宗

正屬籍勅

令李晟家屬籍詔

鐵券

裴寂等恕死詔

朕自起義晉陽遂登皇極經營天下寔仗羣才尚書令
秦王某尚書右僕射寂或契合元謀或同心運始並蹈
義輕生捐家殉節艱辛備履金石不移論此忠勤理宜
優異官爵之榮抑惟舊典勲賢之議宜有別恩其罪非
叛逆可聽恕一死其太原元謀勲効者宜以名聞

武德元年

月八

賜護密國王子鐵券文

維天寶元年歲次壬午九月癸卯朔十六日戊午皇帝

若曰咨爾護密國王子頡里訶夫藩扞所寄惟信是從
節義可稱雖遠無隔卿之先代常附國朝通使有恒書
譯相次自卿父繼立近阻強鄰被制克威有違夙志今
遂能獻誠誠澆澆歸懷自非心悟遠圖何克存先意念此誠懇
嘉尚尤深今賜卿丹書鐵券以旌忠効長表信義永傳
子孫日月同明山河齊久可不美與可不慎與

賜突騎施黑姓可汗鐵券文

維天寶十二年歲次癸巳九月己亥朔六日甲辰皇帝

若曰咨爾骨吐祿毗伽突騎施黑姓可汗登里伊羅密
施惟皇建極聲教及於遐荒惟帝念功禮命加於恭順
卿雖擁在沙漠常扞烟塵識進退存亡之端知古今成
敗之數久率蕃部歸化朝廷兼拒克殘挫其侵軼精貫
白日義光青史績因累著嘉尚良深今授卿持進冊為
突騎可汗重爵貴號以崇其寵丹書鐵券以表其忠宜
保始終永固誠節山河帶礪福祿長存可不慎與

賜懷化王那俱車臯施鐵券文

維天寶十二年歲次癸巳十月戊辰朔十四日辛巳皇
帝若曰咨爾故石國順義王勇那俱車皐施夫柔遠之
道必先文德錄誠之美是加命禮卿之先代累賓朝
化列在藩王卿又能効節輸忠克復居宇扞邊率下循
職修貢信彰夷落義貫幽明言念懇誠良多嘉尚今授
卿特進仍封懷化王并賜丹書鐵券以表忠赤宜執於
恭順保於終始每資犄角之用永固山河之寵可不美

與

賜李納王武俊田悅等鐵券文

陸贄

維興元元年歲次甲子正月癸酉朔二日甲戌皇帝若
曰咨爾某某嗚呼君者所以撫人失於所撫則叛下者
所以奉上失於所奉為尤各當其理德用不擾若乖其
分亂於是生朕德薄化淺昧於君道罔自省咎姑務責
人是以徵師徂征連歲靡息惟爾亦以誠志不達反側
於厥衷阻衆興戎結壘拒守豈非上失所撫而下乖所
奉與書曰萬方有罪罪在朕躬我實不德兆人何咎俾

廢其業離其室家陷於困窮死於鋒刃老疾廢養孤窮
靡依怨結蒼昊感傷和氣朕為人父母得不愧心晨興
以思夕惕以懷自予嗣位迄今六載天將悔禍朕方覺
悟爾亦知衆心厭亂思所以保安叶於朕懷有若符契
非天地合德人神合謀將止殺好生則何以臻此朕是
以上順天意俯從人心滌爾瑕疵復爾爵位坦然靡阻
君臣如初功書鼎彝名藏王府子孫代代為國勲臣山
河帶礪傳祚無絕朕方布大信承天子人若食其言何

以享國於戲其敬聽朕命用保無疆之休吏部尚書同
中書門下平章事蕭復宣

賜安西管內黃燾官鐵券文

維貞元二年歲次丙寅八月丁巳朔三日己未皇帝若
曰咨爾西鎮節度營黃燾官驃騎大將軍行左金吾衛
大將軍試太常卿頓啜護波支惟乃祖乃父代服聲教
勤勞王家勲書鼎彝名列藩籍爾克紹爾祖先之烈而
重之以忠貞嗣守職官祗若教化率其種落保我疆陞

丹誠向風萬里如近是用稽之令典錫以券書若金之
堅永承無變子孫繼襲作我藩臣爾其欽承勿替休命

賜陳敬瑄鐵券文

烹巨鰲者鼎大於滄海斬長鯨者劍倚於青天既立異
勲克膺殊寵李晟免其十死子儀成其九功鏤以金鏞
賜其鐵券後來繼者豈在他人歲寒知松栢之心國難
見忠貞之節卿五山鎮地一柱擎天氣壓乾坤量舍宇
宙自居環衛出擁旌幢論清政而冰鏡無光吐赤誠而

朝霞失色手持玉節身鎮錦城扶乾綱而萬國齊心紐
坤維而百蠻遠指三川欽化一境歸仁朕以稅駕褒斜
省方邛蜀匭匭而來寧鳳輦駘馳而速建龍宮百辟來
朝萬方入貢夏禹塗山之會未盛於斯漢高沛國之歡
無以過此戮阡能如剪草除秀昇若焚巢不讓武侯之
勲無愧文翁之化海東獻款雲南披誠九穀豐登三農
茂盛濟贍軍國拯接朝寮內竭家財外罄公帑十官感
惠一國推功令則巨猾奔逃神州克復將歸上國即別

成都致朕身安由卿忠力前封公爵後賜郡王詢於衆
情未愜羣望令賜卿鐵券捨其十死援泰山而立誓指
黃河以為盟山無壞時河無竭日君君臣臣父父子子
永遠貴昌並皆無故

中和三年十月

賜韓建鐵券文

朕以前代功臣實重信賞至有刻於鼎彝紀在旂常垂
帶礪之言保金石之誓勲賢所付宜懋明恩况卿秉謙
蹈和持重守正屬朕前歲巡狩而乃躬親奉迎李孫之

道在事君周勃之心唯安國畢力扈駕衛我出居充奉
行朝更無餘事可謂忠於社稷光映簡書旋以歸復京
都葺修宮闕載宏舊制皆叶規程朕是殊庸實用嘉矚
雖迭增崇數而未足酬功宜申誓券之文以示旌勲之
典矧夫黃河不竭青山匪窮比此賞延錫于苗裔使卿
永荷祿位長受寵榮對銘鏤以同堅煥聲徽而轉美卿
恕九死于孫恕二死或犯常刑所司不可加責禮命甚
重往惟欽承宜付史館頒示天下

光化元年
九月

附屬籍

安康郡公襲譽聽合譜宗正詔

太僕少卿安康郡公襲譽我之同姓派別枝分惟厥祖
考世敦恭睦襲譽部率宗人協同義舉立功巴蜀誠節
著聞宜有褒崇用超恒序特聽合譜宗正恩禮之差同

諸服屬

武德元年十月

燕公藝賜姓上籍宗正詔

昭德以爵前王令範功茂茂賞有道遺訓使持節幽州

總管上柱國燕公藝早悟機權夙展誠節革運之始立
功燕代鎮守邊要馭控遐荒忠績既宣宜加寵昵可賜
姓李氏上籍宗正封燕郡王食五千戶

武德二年九月

楚王威賜姓附屬籍詔

五等列爵茂績超於恒典四嶽分官連帥總其常賦山
河之賞義在酬庸萬陌之任實資賢哲使持節和州總
管和州刺史東南行臺尚書令上柱國楚王威徃因喪
亂糾合徒旅綏靜淮濱緝寧江介閭閻安堵吏民率職

遠稟朝化具中忠款仍請立功掃除多難誠節旣表志
哉可嘉委以招懷特宜受禮爵命之序式加常秩可使持
節總管江淮以南諸州軍事揚州刺史東南道行臺尚
書令淮南安撫大使上柱國進封王食邑五千戶賜姓

李氏附屬籍

武德三年六月

高開道賜姓上籍宗正詔

褒德叙功有國彛訓任賢賞善列代通規偽燕王高開
道家本海隅志懷慷慨有隋之末州域彫殘招集徒旅

自保邊塞繕修斥堠捍禦寇戎民吏肅清倉庫完實既而審達機變遠慕朝風闔境獻誠歸款內屬請申經略輯寧代北厥功以茂宜崇褒寵禮命之差用超恒級可
使持節蔚州諸軍事蔚州總管加授上柱國賜姓李氏
上籍宗正封葦郡王食邑五千戶

武德三年九月

胡大恩賜姓屬籍宗正詔

疇庸旌善哲王彞訓任賢使能有國通典胡大恩往因隋李夷狄交侵繕甲聚徒輯寧邊境既而阻隔戎境自

保方隅遠慕朝風因機立效催破克黨亭徼無虞抗疏
闕廷以申誠節忠義克舉宜隆寵命因其所統即加榮秩
可使持節代州諸軍事代州總管加授上柱國封定襄
郡王食邑五十戶賜姓李氏上屬籍宗正

武德四年正月

許涼武昭王孫絳郡姑臧等四公子隸入宗正

屬籍勅

勅古之宗盟異姓為後王者設教莫遺其親殿中侍御
史李彥允等奏稱與朕同承涼武昭王後請甄叙者源

流實同系譜猶著雖子孫十億各散於一方而本枝百代何殊於近屬况有陳請所宜敦叙自今已後涼武昭王孫寶以下絳都姑臧敦煌武陽等四公子並宜隸入宗正編諸屬籍以明尊本之道用廣親親之化

令李晟家附屬籍詔

夫能定社稷宏濟生人存不朽之名垂可久之業者必報以殊常之寵待以親比之恩與國無疆時惟茂典故奉天定難功臣太尉兼中書令上柱國西平郡王食邑

一千五百戶贈太師李晟間代哲賢自天忠勇懷濟時
之宏筭抱經武之長才貫以至誠協于一德嘗遭逆難
之際實著戡定之功鯨鯢既殲宮廟斯復春茲勲伐則
既褒崇永言天步之夷載懷邦傑之力思加崇於往烈
爰協比於後昆睦以宗親將予厚意其家宜令編附屬
籍

唐大詔令集卷六十四

欽定四庫全書

唐大詔令集卷六十五

宋 宋敏求 編

大臣

錄勲

長孫無忌等九人各封一子郡縣公詔

封建功臣詔

長孫無忌等十四人並為刺史封國公令子

孫承襲詔

圖功臣像於凌烟閣詔

贈淮西軍大將周曾等詔

賜將士名及奉天定難功臣詔

褒贈淮西立功將士詔

錄陷蕃官于孫詔

為李懷光立後詔

令畫中宗以後功臣於凌煙閣詔

錄李洎等子孫詔

錄功臣子康志寧等各除官職勅

叙用勲舊武臣德音

命京兆府修郭子儀墓詔

錄舊

宥周隋名臣子孫配流詔

賜盧懷慎家粟帛勅

錄蘇環孫繫等各除官詔

錄褚遂良等孫各除官詔

錄魏徵等三人裔孫詔

錄勲

長孫無忌等九人各封一子郡縣公詔

惟王建國厚禮備於元勲惟帝念功茂賞隆於延世是以親賢作屏著在周經支庶畢侯義存漢典開府儀同三司齊國公無忌尚書右僕射邠國公玄齡故尚書左僕射蔡國公如晦靈州都督吳國公尉遲敬德左光祿

大夫吏部尚書許國公士廉兵部尚書潞國公侯君集
右武衛大將軍郢國公宇文士及左武衛大將軍翼國
公秦叔寶瀘州都督宿國公程知節等或宇量凝深地
兼賢戚或風鑒宏遠功叅帳幕或志懷強正便繁左右
或幹略宏舉契關戎旃或委質藩朝陳力王室誠著出
納節表屯夷經文緯武忠勤懇至固已契叶風雲寄深
舟楫雖褒賢之道已紀於旂常而推恩之令未洽於楨
緒宜畀寵章式遵故實無忌玄齡如晦敬德各封一子

郡公士廉君集士及叔寶知節各封一子縣公俾夫

比蹤曩烈如帶如礪垂裕後昆

貞觀五年九月

封建功臣詔

欽明慎徽之朝稽古為本體國經野之治利建為先莫不因可大之功弘可久之德與萬方同其樂百姓共其安享祚遐長卜世年永疏爵以五錫壤以三周監二代煥乎前史晉魏迄今舊章廢寢維城之義闕如建侯之道斯絕王綱斲弛內無匡救之臣國步方迤外無藩屏

之衛致令大盜猖獗動有窺覲蒸庶播蕩屢遭塗炭進
無永為之策退失象賢之典寧邦固本其可得乎朕祇
膺大寶欽承景命勵精治術安緝夏夷九服同軌六合
一家日月所臨無思不服豈伊人力天寔賜之既荷殊
休宜弘大賚封疆郡國褒賜親賢與夫懿戚元勳共享
其利自我作古未必專依前典允今約古隆基垂統令
世祿傳家足以載德圖身厚已足以端成自然國有常
典民獲其福皇家宗室及勲賢之臣德行可稱忠孝永

著者宜令鎮藩作部宣條牧民貽厥子孫嗣守其政非
有大故無或黜免酬勤報効仍宜有差宜令所司明為
條例定等級具以奏聞

貞觀五年十一月

長孫無忌等十四人並為刺史封國公子孫承

襲詔

周武定業祚茅土於子孫漢高受命誓帶礪於功臣豈
止重親賢之地崇其禮物抑亦固磐石之基寄以藩垣
魏晉以降事不師古建侯之制有乖名寔非所謂藩屏

王室永固無窮者也隋氏之季四海沸騰朕連屬殷憂
戡剪多難上憑明靈之祐下賴英賢之輔廓清寓縣嗣
守寶歷豈予一人獨能致此時迺既共資其力世安而
專享其利乃至於斯甚所不取但今之刺史乃古之諸侯
雖立名不同而其監統一也故申命有司斟酌前代宣
條委共治之寄象賢在世及之典司空齊國公無忌等
或材稱人傑望表國章論道廟堂寄深舟楫用資文武
誠著艱難折衝閫外隱如敵國或志力忠烈寔為心膂

或體氣強果是曰爪牙榮名始運功參締構義實休戚
效彰夷險嘉庸懿績簡於朕心宜賜以藩鎮改錫土宇
餘官食邑並如故即令子孫世世承襲

貞觀十一年六月

圖功臣像於凌煙閣詔

自古皇王褒崇功德既勒名於鐘鼎又圖形於丹青是
以甘露良佐麟閣著其美建武功臣雲臺紀其迹司徒
趙國公無忌司空揚州都督河間王孝恭司空蔡文成公
如晦故司空相州都督太子太師鄭文貞公徵司空梁

國公玄齡開府儀同三司尚書左僕射申國公士廉開
府儀同三司鄂國公敬德特進衛國公靖特進宋國公
瑤故輔國大將軍揚州都督忠壯公志玄輔國大將軍
夔國公弘基故尚書左僕射蔣國公通故陝東道大行
臺尚書左僕射鄖節公開山故荊州都督譙襄公紹故
涇州都督郢襄公頌德洛州都督鄖國公張亮光祿大
夫吏部尚書陳國公侯君集故左驍衛大將軍鄭襄公
張公謹右領軍大將軍盧國公程知節故禮部尚書永

興文懿公虞世南故戶部尚書渝襄公劉正會光祿大
夫戶部尚書莒國公唐儉光祿大夫兵部尚書英國公
李勣故徐州都督敬莊公秦叔寶等才惟棟梁謀猷經
遠綢繆帷幄經營霸圖或學綜儒宗德光朝右隱犯同
致忠謹日聞或竭力義旗委質藩邸一心表節百戰標
奇或受服廟堂闢土方面重氛載朗王略遐宣並契濶
迤夷劬勞師旅贊景業於草昧翼淳化於隆平茂績嘉
融冠冕列辟昌言道直寵冠縉紳固以瞻伊呂而連橫

邁方召而長驚者矣宜約故寔弘茲令典可並令畫於
凌烟閣庶念功之懷無謝於前載旌賢之義永貽於後

昆

貞觀十七
年二月

贈淮寧軍大將軍周曾等勅

勅王者體至公而立極明賞罰以垂法旌德表善發
揮忠貞其有推丹誠以奉君臨大節而不奪守志明節
殺身定難則褒勸之典所宜優異李希烈背天逆物通
結羣盜奸謀藏於汴宋罪迹彰於汝鄭傾陷城邑虐毒

蒸黎忠義之徒因懷感激故准寧軍節度都虞候正議大夫試大理卿兼許州別駕占闕兼御史大夫上柱國政和郡王食實封一百戶周曾忍奸邪之亂紀處危逼而思正陰建明義叶誅元克遂與故許州都督鎮遏兵馬使同御寧軍節度副使開府儀同三司賜太常卿兼御史中丞上柱國定州郡王食實封五十戶王玠故淮寧軍節度左廂兵馬使兼十將開府儀同三司賜太常卿兼潞州長史占闕兼御史中丞上柱國常林郡王食

實封五十戶呂從賁故十將輔國大將軍行右金吾大將軍員外置同正員兼賜太常卿上柱國合浦郡王食實封五十戶康秀故節度監押衙宣德郎監察御史裏行賜緋魚袋姚憺故十將銀青光祿大夫賜太子賓客上柱國梁興朝故十將開府儀同三司太常卿河東縣開國伯賈樂卿故輔國大將軍員外置同正員兼賜太常卿侯山欽等誓心定志潛結忠謀將臨汝海之郊師以襄城之野方議梟其同惡獻首鎬京率彼戎旗南屯

蔡邑傳一檄以定計擬尅日而就功希冀有應殲弭可
期事方垂成為魁渠之所糾察緬懷義烈恚櫻屠戮無
辜殞命萬夫增憤形質委于原野忠魂越于草莽恍惚
幽壤茫茫無依朕所以負宸長嗟坐朝興悼念忠良之
不造空名在而身歿休德壯志貫于神明而為元惡矯
誣翻欲歸過豈可使義烈之績泯而不彰宜加褒贈以
示中外曾可太尉賜實封二百戶通前三百戶玠可司
徒賜實封二百戶通前二百五十戶從賁可尚書左僕

射賜實封一百戶通前一百五十戶秀琳可贈尚書右
僕射賜實封一百戶通前一百五十戶愴可贈兵部尚
書賜實封二百戶興朝可贈戶部尚書賜實封一百戶
樂鄉可贈刑部尚書賜實封二百戶仙欽可贈工部尚
書賜實封一百戶仍令右散騎常侍蕭昕往汝州界首
以禮致祭并委李勉哥舒曜與州計會訪其家口父子
兄弟俱以名聞即當類叙別有優獎有子者仍許其回
父官爵其子孫三代以來有過犯者得以遞減一等罪

論用彰峻節淮寧軍節度押衙中散大夫試殿中監兼
唐州別駕占闕上柱國韋清與周曾姚憺始末同志曾
等遇害清以智免率其麾下間道歸誠大節可嘉公賞
宜茂可銀青光祿大夫守太子賓客兼御史大夫定安
郡王食邑三千戶仍賜實封二百戶勲如故朕撫臨億
兆於今五年每旰食宵衣勤求政理推誠委下日異休
兵明未燭幽德慚柔遠戎車尚戒大信猶鬱使忠烈之
士殞身賊庭靜言興懷一食三歎罪已之責實謂在予

勅國家受天明命平一宇內自武德迄今天寶百四十載海內無事崇德廣化澤及生人時洽和平俗登富教鰥寡孤獨咸得其所鳥獸魚鱉亦莫不寧凡今有生實賴亭育寇戎伺間盜起幽燕率土之人莫保性命肅宗以神武戡大難先朝以仁德紹興運區域再造億兆再康室家離拆而復安子孫照嫗而相守勞徠安集垂三十年則我列聖之於天下也惠澤深矣朕以寡昧祗膺寶厯常恐不克負荷固敢怠荒道有未明事多乖謬下

情壅而不達大信鬱而不彰兩河之間羣祲連禍朕務
除大患靡憚暫勞是以興有征之師問干紀之罪昨以
涇原士庶將適汝郊失於撫綏致茲潰叛朱泚乘釁因
構異圖肆其狼心誘我蠹賊謂君可以叛謂天可以欺
橫忽凌悖無所愧畏朕至失守宮闕出次郊畿九廟震
驚萬姓奔駭內省思咎外顧懷慚罪實在予不敢自赦
意者宗社降祐大警于朕躬夙夜殷憂庶乎有補實賴
股肱心膂勵從戎之節方岳將校集勤王之師赴難如

歸見危思奮堅貞勵操何日忘之平巨猾者必仗於羣
雄賞茂績者不限於彞典保勲庸於帶礪傳爵邑於子
孫崇功美名與國終始其諸軍諸使應到奉天懸將士
等宜並賜名奉天定難功臣實封者子子孫孫代代無
絕身有過犯遞減罪二等子孫有過犯遞減一等當戶
應有差科徭役一切蠲免其功臣已後雖衰老疾患不
任軍旅當分糧賜等並給金終身死之後回給家口
十年勿絕如有能梟擒朱泚者即以朱泚在身官爵與

之仍加食實封二千戶朱泚所在有田宅財物悉便充
賜其梟擒朱泚賊大將以下並節級時加優寵仍各與
實封應梟擒朱泚人所有田宅便賜之其餘立功因應
合授功立賞並准令月七日十一日十四日勅處分其
今日已前身死王事者追贈官爵亦稱奉天定難功臣
子孫為功臣之家應合襲封減罪放免差役等一切同

例宣告中外令知朕懷

建中四年十一月二十四日

褒賞淮西立功將士詔

叛臣希烈竊據淮沂師旅一興緜聯莫解勞者役從
不暇受汚者無路自新通邑化為丘墟遺骸遍於原野
每念及此心傷涕流自昔勞師靡有不悔以虞舜之聖
屈於苗人漢武之強弊於戎虜矧乎德猶不逮力或未
全我其永懷亦以自誓乃者下哀痛之詔布寬大之恩
普天戴新殊化必有然則尚勞師旅禦扞封陞有累歲
離棄室家有經時不解甲冑忠雖為國咎實在予君人
若斯寧不知愧賴將相士旅一其誠心奮揚武威慎固

疆宇遠人思服元惡就誅黎庶方致於安寧役戍永期
於休息茂官以旌美賜宴以勞還賞不移時式遵懿典
都統檢校司空平章劉玄佐宜與子孫一人五品正員
官節度使檢校右僕射李澄檢校工部尚書曲環檢校
戶部尚書李準兼御史大夫樊澤等各與子孫一人七
品正員官都防禦使工部尚書賈耽都團練使御史大
夫盧玄卿張建封等各與子孫一人八品正員官檢校
司空平章事李抱負檢校司空平章事李納檢校右僕

射平章事韓滉工部尚書田緒等各遣將士五千人赴河南行營以討不庭厥有成績抱負納滉各與子孫一人六品正員官緒與子孫一人八品正員官應淮西界州縣本軍鎮守及諸道赴行營將士等共賜物三千端足以充賞設仍委本道條例奏聞並與甄叙其行營將健各放歸本道明加宣諭令悉朕懷

興元二年四月

錄陷蕃官子孫詔

乃者吐蕃犯塞毒我生靈倣擾隴東深入河曲朕以兵

戎初定傷疾未瘳務息戰伐之謀將遂通和之請亦知
戎醜志在貪婪重遺修睦之詞允乃尋盟之會果為隱
慝變發墻宮縱犬羊兇狡之羣乘文武信誠之衆蒼黃
淪陷深用惻然此皆由朕之不明致其若此無德於萬
寓實有愧於四海宵旰貽憂何嗟及矣今兵部尚書崔
漢衡等皆國之良士朝之蓋臣嬰繫穹廬眇然殊域念
其家室或未離於屢空祿以息男庶有資於薄俸漢衡
宜與子一人正七品官司勲員外郎鄭叔矩檢校戶部

尚書路泌殿中侍御史韓弇及大將孟日華辛雲李至
言范澄王良貴樂演明陽皆權文誠各與一子八品官
試金吾兵曹參軍袁同直前榆次尉裴頊及副兵馬使
已上各與一子九品官仍委本使即具名銜奏聞

為李懷光立後詔

懷念舊功仁之大也興滅繼絕義之宏也昔蔡叔圮族
周公封其子於東土韓信干紀漢后爵其孥以弓高侯
君集之不率景化我太宗存其胤以主祀詳考先王之

道洎乎列祖之訓皆以刑佐德俾人向方則斧鉞之誅
甲兵之伐盖不得已而用也曩歲盜臣竊發國步多虞
朕狩於近郊指期薄伐將振昆陽之旅以興涿鹿之功
徵師未達於諸侯衛士且疲於七萃而李懷光三軍夙
駕千里勤王上假雷霆之威下逐虎狼之衆議功云始
守節靡終潛構禍胎拒違朝命棄同即異捨頓效逆為
臣至此在法必誅猶示綏懷庶其牽復而梟音益厲稀
突莫遷大戮所加曾無噍類雖自貽伊戚與衆棄之而

言念爾勞何嗟及矣以其前劾猶在孤魂無歸懷之忱
然是用悞軫予欲布陳大信冀以化成保合太和期於
刑措宜以懷光外孫燕八八賜姓李氏名承緒授右衛
率府胄曹叅軍承懷光之後仍賜錢一千貫文任於懷
光墓側置立庄園供養懷光妻王氏拜備四時享奠之
禮嗚呼朕實不德臨於兆人泣辜宥罪素誠所志爾其
保姓受氏宣力承家勉紹乃考之建國庸無若爾父之

違王命

貞元元年

令畫中宗以後功臣於凌煙閣詔

昔我列祖乘乾坤之盪滌掃隋季之荒屯則有熊羆之士不二心之臣左右經綸叅翼締構用端命於上帝付畀四方宇宙既清王業既成乃圖厥容列於新閣懋昭績効式表儀形朝夕不忘永垂來裔君臣之義厚莫重焉貞元己巳歲秋九月我行西宮瞻宏閣崇構見諸臣遺像颯然肅然和敬在色想雲龍之叶應感王業之艱難覩往思今取類非遠且功與時並才為代生尊主庇

人何代不有在中宗則有桓彥範等蓋載之績在玄宗則有劉幽求等申翼奉之勲在肅宗代宗則有郭子儀等掃殄氛祲今則李晟等保又朕躬咸宣力肆勤光復宗祏訂之前列夫豈多謝闕而未錄孰謂旌賢况念功紀德文祖所為也在予曷叢怠有司宜叙年代先後為圖其像列於舊臣之次仍令皇太子書朕是命紀於壁焉庶播嘉庸昭明天下俾後之來者知元勲之不朽

貞元

元
年

錄李洎等子孫詔

建中以來州軍及軍國歸人李洎李再春田昂李士真
康日知李澄楊政義符璘李惠登薛翼蘓清沔等王者
報功義惟遇厚存則加其殊秩歿則恤其遺孤然後忠
不徒施人知所勸故徐州觀察使李洎等頃逢艱阻各
著款誠或以地來歸或率徒効順名迹昭顯史冊具存
先朝念功皆極封賞歲月稍久湮沒日多再有甄明用
申激勸宜委中書門下即訪其子孫量材叙用

元和

錄功臣子康志寧等各除官職勅

君臣運合故殉國以毀家勸賞義明故褒功而顯節存則疇其爵祿歿則祿其子孫然後忠義不遺典章斯在故磁晉隰等州觀察使檢校兵部尚書康日知故徐州刺史兼御史大夫李洎等一十家皆有茂功藏於盟府故命搜訪後嗣光賁前人今志寧等或服戎著績或從官有成或投迹軍府之中或滯才州縣之職咸加甄錄各茂官榮庶乎受祿者無忘於聿修懷忠者使知其必

報勉膺寵渥無替前勞

元和八年八月

叙用勲舊武臣德音

勅朕聞昭德示威先王所以用武禁暴夷難後代安能
去兵故文德誕敷武備宣耀外以環禦四海內以底清
中原則軍旅之制有經師律之能必表朕纂承鴻業虔
奉丕圖宵分永懷何以康濟豈獨鼓鞶有感方思將帥
之臣征伐為心乃寵干戈之士况文武並用古之格言
勲舊不酬勞者何勸惟我高祖太宗以晉陽之旅平一

海內肅宗以靈武之衆收復二京代宗有陝郊元從之
臣德宗有奉天戡難之士每念勲伐無忘寤懷如聞近
日武班之中淹滯頗多雖負才略無由自明又有諸道
薦送大將或隨節度歸朝自今已後宜令神策大將軍
使及南衙常參武臣各具由歷受官年月前後功勲牒
送中書門下若勲伐素高人才特異者候有相當用處
即具名奏聞量加獎擢其常參官資考深久未得遷轉
者准具年月與改轉不得令有淹滯其先受文武官者

亦宜准此使幕賓寮皆有年代改轉軍府大將豈可獨
不叙遷自今已後諸道節度都團練經略等使下各隨
本處其大將名自己曾受監察以上官者並限三週年
量與改轉如有功效合非時與改者不在此限其職名
是兵馬使都虞候押衙以上前後並未曾奏官者亦仰
量績劾奏官轅門委營壘分師有役干戈無由稼穡况
天寶以後屯兵七十餘年皆成父子之軍不習農桑之
業一朝罷歸隴畝頓絕衣糧言念飢寒深用嗟憫應天

下節度使都團練防禦經略等軍所置兵數各委本道
據守舊額以為定數不得輒有減省其有逃亡病死及
犯解退當時擇揀有武力藝能者添補奮行於陣決命
捐軀不顧危亡每嘉忠烈官健有死王事者三週年不
得停本分衣糧如有父兄子弟試其武藝堪在軍中承
名請糧賜者先須收補孝本安親惟深養老用敷恩惠
以慰耆年應軍將及官健有父母年及七十已上委本
州本道每至節歲量與酒麵優養守塞備邊固不可廢

煙塵既靜亭障無虞諸道舊有防秋兵馬在邊上者自
依年代替近師旅屯集饋運頗多不免於諸道留守留
使錢內每貫量抽二百文以充國用幽鎮既以洗雪供
費亦漸有常其河北諸道及河東兗鄆淄青汴宋陳滁
澤潞河陽鄭滑等道并諸鎮並不量抽刁斗晨嚴烽煙夜
警勤勞沙塞寒苦邊陲其沿邊鎮戍烽子等並委所管
節度及城鎮使量與校量上下使其勞逸得均使命往
來本於傳達軍期警急遂至繁多非惟郵傳不供抑亦

號令難一自今已後應沿山東行營兵馬未歸本道已
來進退事機並宜轉委節度使仍仰條疏舊弊一一奏
聞除事關急切須遣專使外其餘書詔文牒一切分付
度支入遞發遣制使中使到行營不得輒受人情物錢
及行非理鞭朴當加訪察義不優容權管之說誠為救
弊隨方適變所貴使人其河南河北鹽法宜委鹽鐵使
與本道節度使審計會商量務以使人為法閱習土宜
則通吏理既因試效可驗政能應河北諸道宜委觀察

使訪察管內見攝官中如或清強有才行課績者具前
後所攝年月并事迹奏聞當與改授從政之方必援風
俗視人相土乃合所宜弛張在達於無私法令所期於
不撓應河北諸道并鄆兗青等道應有新舊等科條有
不便於人不宜於俗者委宣慰使與所在長吏商量廢
置務從人便於戲朕代天子人撻執重器不以四海之
富而恃其力每以百姓為念而兢於心慮文教之未敷
虞武備之多闕所以輟食當宁未夜求明揣摩萬幾寧

止三省頃以馭宇之歲藩方久安委寄廣謀以緝軍政
而有司不達苟以惜費為心致茲停減之名無裨毫厘
之用使軍中老幼愁歎無歸朕博聽羣言用革羣弊舉
其指要計叶人情庶乎侯伯列城典我師旅勵精撫士
用副憂勤中外宣示明知朕意

長慶二年
三月十日

命京兆府修郭子儀墓詔

漢祖護信陵之冢厥有前聞晉朝修子房之墓垂有故
事況本朝元老功冠鼎彝屬肩嗣凋零墟域推毀雖古

無修墓孔子有言而義存掩骼周王是命斷從朕意適
表念功宜減賜御膳錢三千貫文催丁匠即日修築仍

令所司明年春仲以太牢祭于儀廟

廣明元年十月

錄舊

宥周隋名臣子孫配流詔

朕聽朝之暇每觀前史歷覽名賢佐時忠臣殉國何嘗
不想見其人廢書欽歎至於近代以來年載非遠然其
屑緒或當見存縱未能顯加旌擢無容棄之遐裔其周

隋二代名臣及忠節子孫有負觀以來犯流配者宜令

所司具錄奏聞

貞觀中五年七月

賜盧懷慎家粟帛勅

故銀青光祿大夫檢校黃門監漁陽縣開國伯贈荊州大都督府盧懷慎衣冠重望廊廟周才訏謨當三傑之一學行總四科之二等平津之輔漢同季文之相魯節鄰於古儉實可師雖清白燕翼羸金非寶然妻孥貧窶擔石屢空言念平昔彌深歎悼宜惜凌統之孤用旌晏

嬰之德宜賜其家物一百段米粟二百石

開元四年十一月

錄蘇環孫繫等各授官詔

朕惟承累世之業追先正之勞濟於艱難代有勲烈既而本根已遠枝葉稍零詔書屢勤於褒飾有司不忘於遴揀茲命宰輔載宏搜揚錄其大功果獲良嗣蘇繫等咸有茂學懿行勗於前修皆人之領袖族之狐趙類能而舉各命以官或任以糾繩或參於閭列庶乎旌太傅之德擬將南城之封紹鄼侯之肩不俟東門之感忠義

獲寵古今同之

和元

錄褚遂良等孫各授官詔

褚遂良五代孫虔等朕觀列聖紀冊祖宗盛業粲然在前其或道有污宗政有善否未始不繫乎當時輔弼嘗因寢殿言諸宰臣勉其匡益協心推戴且以元歲乙巳登應門敷大號俾疇賢相以訪遺裔或才器擅價各列官業或血食不繼宗祊已蕪如遂良之委笏面爭垂名史書仁傑之恢復廟社事形先覺宋璟之文吏骨鯁功

叅洽平元紘之守規畫一持成有裕其胄僅存不絕若
髮各受邑吏使其自試

太和二年三月

錄魏徵等三人裔孫詔

武德以來輔相之臣以道致君以勞定國若贈司空徵
故侍中知古故太尉冕語其功次皆在第一清風餘祉
宜及乎後昆爾等乃其曾孫式叶搜獎俾奉貽謀之慶
用覃延賞之恩各命以官勉爾祖德

太和二年十一月

唐大詔令集卷六十五

欽定四庫全書

唐大詔令集卷六十六

宋
宋敏求
編

典禮

封禪

答請封禪詔

貞觀十五年封泰山詔

停封泰山詔

貞觀二十年允羣臣請封禪詔

封禪詔

停封禪詔

封禪器用從文詔

永淳二年停封中岳詔

開元二十三年封泰山詔

斷屠及漁獵採捕詔

處分行事官

乾封玉牒文

開元玉牒文

開元十三年東封赦書

后土

幸汾陰祠后土勅

祠后土賞賜行事官等制

后土赦書

封禪

答請封禪詔

自有隋失道四海橫流百王之弊於斯為甚朕提劍鞠
旅首啟戎行翼建興運克成鴻業遂荷慈眷躬承大寶
每日昃思治不敢康寧競懷夕惕用忘寢興履薄御朽
不足以喻賴三靈顯命百辟同心海外無塵遠方慕義
但流道永久凋殘未復田疇多曠倉廩猶虛家給人足
尚懷多愧豈可遽追前代取譏虛美所望恂恂濟濟叶
力盡誠匡其不逮致之至道如得稚頌形於金石菽粟

同於水火反撲還淳當如來議

貞觀五年正月

貞觀十五年封泰山詔

肇有蒸庶樹之司牧載籍所紀風烈猶存至於道洽品物功成守縣天睠彰於符瑞人事表於隆平莫不增封岱宗廣禪梁甫榮鏡六合對越三神前聖所以垂其尊名後王所以仰其休烈蓋由此也自火德既衰三光分裂金行失御九鼎沉淪諸華競逐彝倫大壞雖周室削平趙魏隋氏混一文軌而金革之事未戢於封疆雅頌

之音弗聞於朝廟遂使至教闕如淳風莫反齊郊絕類
帝之禮日觀缺升中之儀其已久矣朕丕膺景命嗣修
鴻基承大亂之餘當率土之責負宸興惕納隍在慮上
憑宗社之靈下資士庶之力草昧伊始援干戈以靖亂
區夏既平弘禮樂以緯俗尉侯無警菑畬有年比屋咸
保其歡含氣不違其性殊方異域盡地界而來廷應圖
合紫殫天符而表瑞緬懷載籍詳求諸已豈伊寡德能
致此乎固乃上玄之所叶贊也而羣公卿士百辟庶寮

固陳人祇之意請遵封禪之典推而不居至于數四文武之情彌切內外之議日聞請誠繁頓淹歷年載朕繼迹百王因心萬物上奉蒼昊義在薦功下撫黎元方祈厚福既迫茲理敢不祇從猥以眇身齊美上代永言夙志凜乎增惕可以來年二月有事泰山所司宜與公卿并諸儒士并朝臣有學業者詳定其儀博考聖賢之旨以允古今之中務盡誠敬稱朕意焉

貞觀十五年四月

停封泰山詔

自古聖王受天之命建顯號於封禪揚洪名於竹帛者莫不功濟夷夏道叶人祇然後登泰山之高刊梁甫之石未有七德靡紀九部寂寥而欲齊聲於聖哲並美於篆籀者也朕承宗廟之重當區宇之責寅畏三靈憂勤百姓雖戡剪禍亂定克遐荒而至教猶儆刑典未措勝殘之化未洽於率土和平之風多慙於往烈是以覽經籍而自失想壇場而增懼亟寢縉紳之奏屢拒公卿之請遠巡大典荏苒數載近者百寮庶尹頻繁抗表殷勤

固陳咸以為兩儀交泰四夷賓服禮讓興行年豐穀稔
蒼昊呈符於上靈符不可以久替黎獻協心於下衆欲
不可以固拒朕迫茲羣議敢不敬從欲薦功上玄大報
后土升中之儀已具省方之期有日今太史奏有彗星
出於西方撫躬自省深以戰慄良由功業之被六合猶
有未著德化之覃八表尚多所闕遂使神祇垂祐警戒
昭然朕畏天之威寢興靡措且曠代盛典禮數非一行
途之間勞費不少東夏彫弊多未克復將送儀仗轉運

糧儲雖存節省之儀終煩黎庶之力非惟上虧天意亦
恐下失人心解而更張抑有故實前以來年二月有事
泰山宜停庶夙夜自修遂其罪已之志勤恤匪懈申以
納隍之情儻蒙靈祇迴睇宗社錫福朝廷同於大道風
俗歸於朴素告成之美更思其宜仍命所司泰山有前
代帝王因封禪立碑及石函之檢類遭離亂被賊毀廢
並修立瘞藏之

貞觀十五年六月

允羣臣請封禪詔

朕遐觀哲王煥在方冊功既成矣咸修禮以升中道既
行焉必奉符而告禪所以發揮天命昭告上靈其有建
顯號以劄鴻徽施尊名而騰茂烈者莫不揚輝於鏤玉
絢景於塗金昭昭然麗三辰而並運滔滔焉播四溟而
不極朕誠寡德良深景慕曩昔氓俗彫弊國步甫安勉
致隆平日不暇給槐卿守闕請繼美於云亭岳牧叩閤
祈踵武於梁岱自惟菲薄至道未凝抗禮昊穹實惟疑
懼緬尋幼齒運終交喪忘其家以徇天下委其體以濟

寰區翊戴先皇削平諸夏出於萬死首導五橫之源不
顧一身光錫兆人之命自越爐炭獲反營魂拔於鬼籙
並登仁壽切惟天地之大德存於施生朕以徑寸之小
心襲於造育降斯休泰諒或由茲不然者何能致於此
也遂得池隍象浦苑囿龍沙置一候於鷓林同一文於
鯨水並資天睠賁以咸寧豈朕之微而能及此今茲列
辟卿士洪生碩儒各述靈徵累陳丹款既迫羣議當事

敬從

貞觀二十
年十二月

封禪詔

許景宗

門下朕聞天大地大首播黎元媧皇地皇肇恭立錄是
知施生為德處崇高而不言亭毒攸資委欽明以司契
洎乎三正迭建五運相遷休烈存乎墳典至道流乎雅
頌歷茲十代咸宅九州逖聽風聲抑可知矣其有仰齊
七政府會百神祭靈睭於祥符報立功於昭告莫不罄
情梁甫繼踵云亭對越兩儀盡先聖之能事揚歷三統
垂曩哲之尊名懸鏡天衢罔不由於此也自中陽絕紐

堙赤檢於窮泉官孽紹興阻黃星於天塹永嘉東徙化
金馬以為牛道武南徂飛蒼鵝以登闕祚周舍岳胤
建三業以巢傾隋拜舜後及二世而舟覆莫不以凶易
亂警畏迹而橫奔以暴代昏同抱薪而止燎咸資攸斁
之道冀及淳化之深各懷巨壑之心規享上靈之佑却
行求進其可得乎由是寂寥十祀無懷之風不嗣泯棄
七經子長之言殆絕遂致成山日觀久闕井中之儀汶
上明堂疇聞類帝之義顧瞻禮樂深有可嗟朕初踐危

機慙斯窮運上同附翼下靡息肩化感天狼度劉帝寓
鴻波蕩岳溺橫流而因訴大浸稽天墊重昏而莫極惴
惴黔夏各垂餌于鯨鯢籍籍僵屍並糜肌于喫竄上靈
慈惻爰啟朕心景命潛通稟其仁育之性陰符煥發導
以戡剪之功於是負荷休徵援旗鞠旅肅恭儲祉吟雲
躍鱗順朱鳥以行誅騫丹鳳而反舉射九鳥而懸日月
區品物以昭陽和煉五石以造乾坤濟崩角以全眉壽
於是上尊先帝凝旒於廟堂躬履兵鋒憂勤於燮輔既

而仰逼威命俯頌樂推起自唐侯言膺下武深推幽贊
之重自勗若厲之懷遂至靈貺無涯剪旄頭而降錫遊
魂削狂盡窮髮以開疆東苑蟠桃西池昧谷咸覃正朔
並充和氣校凝旒於往代窮今古而罕聞考光宅於前
皇罄紬緗而莫覩方今六合之表擊壤傳聲四海之隅
菑畲歲稔含氣者靡乖其性稟命者相賀其生豈朕眇
身勤勞所逮諒由高明垂鑒祚此隆今茲三事大夫百
寮庶尹各述天人之貺請躡封禪之蹤顧惟寡薄推而

不有杜絕羣言至于數四中外之情尤切企佇之望逾
深朕又詳思荷財成於穹昊自古賢哲並歸功於大帝
迫斯至理弗獲固辭展禮上玄寔增慙懼可以貞觀二
十有二載仲春之月式遵故實有事於泰山諸內外臣
僚岳牧卿士既相敦喻將事告成各罄乃心無虧政道
恪居所職務協時邕所司宜與縉紳先生載筆圓冠之
士詳求典禮裁其折中深加嚴敬稱朕意焉其今年朝
集使宜集洛陽宮應朝集依十五年三月八日勅諸王

並聽來朝其北藩日磧以南大首領赴會仍令天下諸
州搜揚側陋其有學藝優洽文材蔚瞻政術甄明才膺
國器者並宜申送限以來年二月一日摠集泰山庶令
作賦擲金不韞天庭之揆被褐懷玉無溺屠釣之間務
得英奇當加不次主者施行

自觀二十
一年正月

停封禪詔

門下朕聞探玄蹟者先實而後賓體至公者本仁而末
禮名歸於已往哲存而弗務德利於人前聖徇而為急

是用範圍天地權輕重以會時宜取則陰陽適變通以
從衆欲由是古之封禪無奪事機所謂奉天咸資務隙
朕仰窺前志歷選哲王無懷有巢緬逾絕契之表龜文
鳳紀越在俎豆之先叩寂寞以傳疑故可略而言也至
如三元立統百物正名步驟之軌非遙損益之原可挹
雖則克心廣運局壘域於流沙禹迹遐宣限要荒於碣
石猶且先弘即叙次敘玉帛之儀首創賓門方備云亭
之典告成之義固弗由茲况朕奄有方輿悃誠該於千

古仰承靈睭降福走於百王巨海所環莫非臣妾長河
攸括並入封疆日者夷夏同文禎符狎至謂可鳴鑿日
觀勒牒仙閣許以來春親行告禫而今延陀一姓流竄
西垂控絃千許初歸正朔亡其砂塞之地遊魂戴斗之
鄉一物之微猶警心於夕惕九夷乃陋敢忘懷於施
生新就繫維理湏安置又以朕蚤歲躬勤拯溺至於炎
月浚北不安公卿庶僚各勤諄請遂有翠微之役非無
板築之勞既而山谷阻深朝宗有礙重披丹懇請建王

華朕以寸心經綸億兆冒茲隆熱貽朝野之深憂既鑒
乃誠副率土之僉望遂復頻有造興恐致煩勞兼聞河
北數州頗傷淹滯既為民父母思濟黎元順動升中理
無兼遂其介丘大禮宜且權停前追諸王及四方岳牧
并蠻夷酋長令以明年二月會泰山者令並宜停其集
便及選舉人等前令詣洛陽官可依常年集限並赴京
師請為封禪事舉人營造轉營等事以上亦宜並詔停
其玉華宮所立制度前已下詔務從菲薄今乃庶事減

省更令卑陋示免風雨稱朕意焉可分道馳驛散頒天

下主者施行

貞觀二十一年八月

封禪器用從文詔

古今典制文質不同至於制度皆隨代革惟祭天地獨不改章斯乃自處以厚奉天以薄今又封禪之禮即用玉牒金繩器物之間復有瓦樽桔席一時行禮文質頓乖駁而不備深為未當其封祀降禪壇所設上帝后土位先設豪桔瓦甌盃等並宜改用茵褥壘爵每事從

文其郊祀亦宜準此也

麟德二年十月

停封中嶽詔

朕聞仁者德之本叶亭育之至途禮者道之末乃帝王之餘事歷選往初詳觀曩躅惻隱以孚其志變通以會其神朕以虛薄祇膺寶位旰食宵衣懼忝於宗社如傷如厲佇濟於黎元每以皇基肇開範圍覆載遺思所覃昭格區宇虔荷靈命常慮下虧鴻業遍刊群岳不足上報玄功已升聞於日觀思款謁於天臺志在告成諒非

為已屬今茲豐稔方有事於嵩丘崇累聖之丕績祈兆
人之嘉佑頃者分使出巡存問風俗河南河北尚有十
餘州旱澇加以朔方寇盜時復侵邊關內流民未能復
業一物失所猶甚納隍數郡不寧豈宜備禮前欲以來
年正月封中岳者且停之

永淳二年十一月

封泰山詔

自古受命而王者曷嘗不封泰山禪梁父答厚德告成
功三代之前率由斯義越自魏晉以降迄至周隋帝典

闕而大道隱王綱弛而舊章缺千載寂寥封崇莫嗣物
極而復天祚我唐武文二后應籙受圖洎于高宗重光
累盛承至理登介丘懷百神震六合紹殷周之統接虞
夏之風中宗弘懿鑠之休睿宗穆清粹之道魏魏蕩蕩
無得而稱者也朕昔勛多難稟略先朝虔奉慈旨嗣膺
丕業是用創九廟以申孝敬禮二郊以展嚴禋寶菽粟
於水火捐珠玉於山谷兢兢業業非敢追美前王日慎
一日實以奉遵先訓至於巡狩大禮封禪鴻名顧惟寡

薄未遑時邁十四載于茲矣今五材無青百穀有年刑
罰不用禮義興行和氣氤氳淳風泊淡蠻夷戎狄殊方
異類重譯而至者日月於闕庭竒獸神禽甘露佳醴窮
祥極瑞者朝夕於林籞王公卿士罄乃誠於中鴻生碩
儒獻其書於外莫不以神祇合契億兆同心斯皆列祖聖
考垂裕餘慶故朕得荷皇天之景祐祖廟之介福敢以
眇身而顯其讓是以敬承羣議弘此大猷以光我高祖
之丕圖以紹我太宗之鴻業永言陟配祇感載深可以

開元十三年十一月十日式遵故實有事泰山所司與
公卿諸儒詳擇典禮預為備具勿廣勞人務存節約以
稱朕意所沿封禪儀注兵馬陪集並皆條奏布告遐邇
開元十二年
年十二月

斷屠及漁獵採捕勅

勅自古明王仁及萬物令助天孳育方欲告成其緣祭
祀及在路供頓犧牲籩牢禮不可闕除此外天下諸州
令並斷屠及漁獵採捕駕回至京任依常式

處分行事官

勅封祀告成為萬姓祈福必資清潔以副朕心其行事
官及齋郎應致祭者宜令御史行牒齋坊勿容踈忽十一
月

乾封玉牒文

嗣天子治敢告于昊天上帝有隋運極屯危數窮否塞
生靈塗炭鼎祚淪亡高祖仗黃鉞而救黎元錫元龜而
拯沉溺太宗功宏鍊石定區宇於再麾業壯斷鼉飲滄

溟而一息臣忝承餘緒繆延積慶遂得崑山寢燎炎海
輻波雖業茂宗祧實降靈穹旻令謹告成東岳歸功上
玄俾大寶克隆鴻基永固凝薰萬姓陶化八紘

開元玉牒文

有唐天子臣隆基敢昭告于昊天上帝天啓李氏運興
土德高祖太宗受命立極高宗升中六合殷盛中宗紹
復繼體不定上帝眷佑錫臣忠武底綏內難推戴聖父
恭承大寶十有三年敬若天意四海晏然封祀大岳謝

成于天子孫百祿蒼生受福

東封赦書

門下朕聞天監惟后后克奉天既合德以受命亦推功而復始厥初作者七十二君道德洽著時至符出皆用事於介丘升中於上帝人情之所望果有以塞之皇王之叙固可得而言也朕接統十載承光五葉惟祖宗之德在人惟天地之靈作主往有內難幽贊而集大勳間無外虞守成而續舊服未嘗不乾乾終日思與公卿大

夫上下叶心聿求至理以弘我列聖其庶幾乎馨香令
九有大寧羣黎樂業時必敬授而不奪物亦順成而無
妖懋建皇極幸致太和洎乃幽遐率皆感被戎狄不至
惟文告而來庭麟鳳已臻將覺悟而在藪以故凡百執
事極言大封顧惟不德初欲勿議伏以先聖儲祉與天
同功荷傳慶以在令敢侑神而無報大節斯在朕何讓
焉遂奉遵高祖太宗之業憲章乾封之典時邁東土柴
告岱岳精意上達肸鬻來應宿信行事雲物呈祥登降

之禮斯畢嚴配之儀獲展百神羣望莫不懷柔四方諸
侯莫不來慶斯事天道之介福也邦家之耿光也無窮
之休祉豈獨在予非常之惠澤宜其逮下可大赦天下
自開元十三年十一月十三日昧爽以前大辟罪以下
罪無輕重已發覺未發覺已結正未結正囚繫見徒咸
赦除之惟十惡死罪不在此例流人未達前所放還其
有挾藏軍器亡命山澤百日不首復罪如初敢以赦前
事言首者以其罪罪之内外文武官三品以上賜爵一

級四品以下一階邠王守禮寧王憲岐王範薛王業各
與一子三品官公主嗣主縣主郡主各與一子官其應
文武行從官加階之外並賜勲兩轉三衛引駕細引黃
衣長上飛騎曠騎先有武散官加兩階未給武散官各
賜勲兩轉衛士馬主軍戎主幕士掌閑供膳太常及仗
內聲音人行署及蕃官七色并別勅雜色定名行從人
亦賜勲兩轉緣大禮登山供奉侍從行事舉脚等官
三品以上特賜一階仍與一子官四品以下特賜一階

仍賜勲兩轉量與進改其四軍別抽登山宿衛及諸司上山執當官三品以上賜爵一等與一子出身四品以下加一階賜勲兩轉亦量進改其白身人及行署蕃官放蕃選其山下昇壇行事官三品以上加爵一等賜勲一轉四品以下加一階賜勲一轉選日稍擾諸獻官及宿衛齋宮將軍率中郎并郎將并兩京留守諸軍節度使并升壇例諸有職掌押當非昇壇例諸有職人加一階選日優量其加階應入三品五品人非特賜者並依十一年三月

二十八日勅節限齋郎禮生見任官前資官以上人並依資量材與處分未出身者放出身皇親別勅承恩陪位官者亦准此諸州岳牧四府長史朝覲陪位者泛階之外各賜勲一轉諸方使人及諸州父老宗姓并從家子孫至岳不得陪位者並賜勲一轉物五段諸州及兗州道僧至岳見大禮者並賜五段孔子後褒聖侯量才與處分天下致仕官各依本品賜一季祿并束帛其陪位者仍賜勲一轉諸蕃侯王酋長來會禮者各賜加一

官至都節級賜其入朝留在邊軍人亦准此其蕃中祇
候衙官刺史縣令並與賜物及袍帶哭厥可汗小殺等
諸國王守護塞垣歲月朝貢並賜物付使將往侍老年
百歲以上者板授下州刺史婦人板授郡君年九十以
上板授上州司馬婦人板授縣君年八十以上者板授
縣令並婦人並級量賜束帛其預見大禮侍老各別加
侍丁一人孝子順孫義夫節婦旌表門閭終身勿事行
人之家及鰥寡悖獨并疾病不能自存者委州縣長官

倍加存恤諸軍行有文武散官者加一階白身者
賜爵一轉負欠官物逋懸租調並宜放免其行過
州縣供頓劬勞并帖頓百姓有雜差科並車馬夫
役者并免一年租稅兗州免二年租稅當頓官人
始末不絕者與中上考仍賜勲一轉朕永為王業
繫賴舊勲元首股肱其猶一體自武德以來功臣
宰輔或名存王室遺嗣沈淪或身無大故銜屈泉
壤直令所司放擇申理唐元年六月初十日立

功官人往屬艱難能盡忠義今成大禮何日忘之
宜各與一子出身無子者任回與周親之人有司
試策三道等第次獎朕躬陟天門宿齋日觀時屬
嚴冬雪後初變風寒露立祈恩誓欲代人當咎俯
仰之際頓息霜飈奠獻之辰變同韶景誠荷上天
垂佑亦賴靈山吐祥詩云無德不報宜封泰山神
為天齊王禮秩加三公一等宜令所管崇飾廟祠
環山千里宜禁其樵採給近山二十戶復以奉祠

神率土之內賜脯七日任於村坊內宴樂不得率斂
煩勞其節文有未霑及者有司比類奏聞其封祠
有數處行事者從一處叙赦赦書日行五百里主者
施行

后土

幸汾陰祠后土勅

勅王者承事天地以為主郊饗泰尊以通神盖燔
柴太壇定天位也瘞埋太折就陰位也將以昭告靈

祀克崇嚴配爰逮秦漢稽諸祀典甘泉於雍時后
土於汾陰既遺廟之巍然亦靈光而可燭朕觀風
唐晉望秩山川肅恭神明思致禋敬為人祈福以
輔昇平合此神祇應於嘉德宜以來年正月北巡
狩行幸至汾陰以二月祀后土所司宜准式

開元
十年

二月

祀后土賞賜行軍官等制

自古受天之命作神之主崇德祀地盡孝配親存乎

禮經不可闕也朕承累聖之緒仗卿士之力方隅
清謐宇宙又安北巡并都南轅汾土覽漢武故事
修后土舊祠時為仲春地氣萌動將先政本為民
祈穀齋戒惟寅粢盛惟潔仲尼曰吾不與祭如不
祭豈非躬盡孝敬以致神祇乎而經始遺壇寶鼎
出地奠茲幣玉榮光塞河將何以幽答神心上應
靈貺朕又懼焉今大禮克舉休允祥洽自天之佑
豈予一人思與百辟同茲嘉慶亞獻邠王守禮終

獻寧王憲各賜七百疋申王撝岐王範薛王業各
賜帛五百疋餘上壇官三品以上賜爵一級四品
以下各加一階應入三品四品見任四品官以上
先授正四品以上階經三十考者六品以上官授
正六品以上階經十六考者令所司勘責奏聽進
止諸公大禮有職掌者官賜勲兩轉餘陪位官賜
勲一轉中書門下三品六曹尚書御史大夫食實
封三品以上功臣各與一子官其立功萬騎身亡

歿者雖預創業不見盛時念功思舊情有感惻
並令所司檢勘亦各與一子宮改汾陰為寶鼎縣
官同升壇官例賜一階管壇一鄉復給一年其駕
行幸處百姓必供頓應須供當者仰置頓使商量
奏聞及制文不該者所司亦比條件聞奏

開元十一年二月

月

后土赦書

張九齡

門下昔者巡狩所至柴瘞所在蓋取誠享以遵告類朕

躬承祖宗之烈獲主神祇之祀夙夜祇畏不敢荒寧故
勤兵朔陲先展義於粉社迴旌睢上遂有事於郊壇王
者父事天母事地則漢氏祈穀未始正名周禮降神乃
為徽福而已朕以天命為重子道為先惟茲精誠在乎
教孝庶蒙福於四海期永康於兆人是以率由舊章恭
敬明祀嚴配之誠既展奠獻之禮又終且春秋之義大
事在祀齋祭之福庶品維祺豈獨在予而有斯慶可大
赦天下自開元二十年十一月二十一日昧爽以前大

辟罪以下罪無輕重已發覺未發覺已結正未結正咸赦除之官人犯賊及有事被推者本罪雖原不得更令却上仍別與處分自奉先以來有雜犯流移人并配隸人各量移近處左降官未經量移未復本資者奏聽進止天下遭損免州應損戶減一分以上者及供頓州無出今年地稅如已徵納聽折來年地稅逋租懸調貸糧種子欠負官物在百姓腹內者亦宜准此其不損免州自開元十七年以前所貸糧種子欠負官物在百姓腹

內者亦宜准此諸州緣供頓差帖助夫亦放其家今年
地稅孝子順孫義夫節婦旌表門閭終身勿事諸州侍
老百歲以上賜粟七石九十以上賜粟五石八十以上
賜粟三石所由速付勿淹旬日太原潞府侍老等先已
加恩不在此例亞獻皇太子鴻賜物二千足終獻慶王
潭賜一千足邠王守禮寧王憲薛王業各賜物一千足
忠王浚以下各賜物三百足夾侍正衣進珪捧珪汝陽
郡王淳等各賜物三百足皇太子夾侍正衣各賜物一

百五十疋裴光庭蕭嵩弼亮朕躬弘益斯遠不有優
異何殊等倫加階賜爵之外各與一子官無子者任與周
親仍各賜物三百疋二王後各賜物二百疋長公主各
賜物三百疋嗣王郡主縣主各賜二百疋行從文武官
三品以上賜物八十疋四品五品賜物六十疋六品七
品賜物四十疋八品九品賜物二十疋升壇官三品以
上特賜一階四品以上各加一階應入三品五品官階
相當不限考數聽得入知頓使及判官修禮儀官撰玉

冊官知頓御史等加一級修壇揚州刺史及修壇官各
賜物一百疋其已有升壇職長從一頭處分緣大禮有
職掌官賜勲三轉行從官首末不絕及陪位官各賜勲
兩轉內外文武官三品以上賜爵一等四品以下各加
一階致仕官三品以上賜物七十疋四品五品各五十
疋從蕃客鴻臚安置陪官見大禮者宜賜物五十疋節
級分付南北衙應宿衛齋宮官及左右廂知兵馬虞侯
總管以上及判司別奏兼孔目等官更加勲一轉前資

官選日稍優與處分白身人有資勞者簡選之日優與處分無資蔭者賜勲兩轉仍各賜物五段兩營弓手六蕃併行宜各賜勲兩轉物五段仍量折蕃役諸位曠騎及兵角弓手官馬主掌閑幕士駕供膳主膳習馭工人樂人雜尹官戶白身有職掌人合行從人等各賜勲一轉物三段其齋郎既是現任官准壇上壇下有執掌官吏處分執彈三衛及禮生贊者各減二年勞無勞可減者簡選日稍優與處分流外行署從者各賜勲一轉有職

掌者各兩轉供頓州刺史同陪位官例始末轉支頓官
各與上下中考蒲州刺史寶鼎縣官同升壇官處分管
壇一鄉百姓給復二年蒲州侍老等准太原潞府例降
一等武德初功臣每有大慶必存追遠業參運始義合
賞延其子孫沈翳無在朝者宜令勘責即與一子官唐
元初立功臣等艱難之際誠效亦深言念其初豈忘終
始其三品以上各賜紫金魚袋有亡歿者優贈一官仍
與一子官已得官者量加優與兩京留守京兆河南尹

四大都督府長史諸軍節度副大使准行從官例處分
諸方通表䟽使人預見大禮准陪位官處分諸道陣亡
人家仰州縣存恤不周濟者量事賑給諸道健兒別勅
行人各賜勲一轉仍令所司勘會團官奏寫告身送付
諸道行人或有身死逋逃猶徵課役累及親鄰即宜審
勘為其除削皇親中有文武才用堪任使者委宗正以
其名上當與獎擢五岳四瀆名山大川自古聖帝明王
忠臣輔相各令致祭務其誠潔赦書所未該者所司

比類奏聞亡命山澤挾藏軍器百日不首罪復如初敢
以赦前事相告者以其罪罪之率土之內賜酺三日赦
書日行五百里布告遐邇咸使聞知主者施行

唐大詔令集卷六十六

欽定四庫全書

唐大詔令集卷六十七

宋 宋敏求 編

典禮

南郊一

貞觀十七年冬至有事南郊詔

祭圓丘明堂並以高祖太宗配詔

郊禮唯昊天

開元十一年郊天制

命宰臣等分祭郊廟社稷勅

外壇入廟行事官先去劍佩及履勅

天寶元年南郊制

每載四孟合祭天地詔

天寶五載南郊詔

元年建子月祭圓丘詔

百官議大禮期日勅

罷告謝郊廟勅

以旱停南郊勅

南郊一

貞觀十七年冬至有事南郊詔

朕聞上靈之應疾於影響茂祉之興積於年代朕嗣膺
寶厯君臨區宇憑宗社之介福賴文武之同心時無風
塵之驚野有京坻之積厚地降祉貞石表祥瑩翠色而
流光發賁質而成宇前紀厥初之德次演卜年之永復

述儲貳之美並名字昭然楷則相次曠代之所未聞故
老之所未覩猥以寡德虔奉成命緬惟往載良增兢惕
自天之祐豈惟一人無疆之福方覃九土自非大報泰
壇稽首上帝則靡伸奉天之志寧副臨下之心今年冬
至有事南郊所司率由舊典

十月

祭圓丘明堂並以高祖太宗配詔

夫受命承天崇至敬於明祀膺圖纂錄昭大孝於嚴配
是以薦鯨鱮於清廟集振鷺於西雍宣雅頌於太師明肅

恭於考室用能紀配天之盛業嗣積德之鴻基永播英
聲長為稱首自周京道喪秦室政乖禮樂淪亡典經殘
滅遂使漢朝博士空說六宗之文晉代鴻儒爭陳七事
之議或同昊天於五帝或分感帝於五行自茲以降遞
相祖述異論紛紜是非莫定朕以寡薄嗣膺丕緒肅承
禋祀明發載懷虔奉宗祧寤寐興感每惟宗廟之重尊
配之宜思革舊章以申誠敬禮曰化人之道莫急於禮
禮有五經莫重於祭祭者非自外至也自内生於心也

是以惟賢者乃能盡祭之義况祖功宗德道冠百王盡
聖窮神義高千古自今以後祭圓丘明堂感帝神州等
祠高祖太武皇帝太宗皇帝崇配仍總祭昊天上帝及
五天帝於明堂庶因心致敬獲展虔誠宗祀配天永光

鴻烈

乾封二年
十二月

郊禮唯昊天稱天五帝只稱帝制

天無二稱帝是通名承前諸儒樂生同異乃以五方之
尚亦謂之為天假有經傳樂文經是名實未嘗稱號不

別尊卑相混自今郊之禮唯昊天上帝稱天自餘五帝

皆稱帝

永昌元年九月

開元十一年郊天制

帝王承天必崇告類之典文武尊祖是導嚴訓之義所以克荷成命昭升前烈蓋王者之子道乃聖人之神教朕以寡昧猥承丕緒獲主祭祀一紀於茲輔相之宜下不足以被物馨香之德上不足以動天故歲或不祭刑且未恤內省為愧大禮猶鬱星晷聚遷夙夜祗懼今四

夷內附諸侯率職羣生和洽萬物阜蕃猶恐教化未孚
求之皇極誠有達觀於國風故親巡岱阿祈穀睢上神
畝有答歲物以豐此先聖無疆之休上玄啟祐之貺冀
因報謁式展誠敬宜以迎日之至允備郊天之禮所司
詳擇舊典以聞

九月

命宰臣等分祭郊廟社稷制

孫逖

勅時和年豐神所福也精意備物祭之義也朕每為蒼
生常祈稔歲徵誠有感丕應乃彰今宗社降靈神祇效

社三時不害百穀用成遂使京坻遍於天下和平之氣
既無遠而不通禋祀之典亦有祈而必報宜令兵部尚
書兼中書令晉國公李林甫工部尚書同中書門下三
品幽國公牛仙客即分祭郊廟社稷尚書左丞相裴耀
卿祭中岳禮部尚書杜暹祭東岳御史大夫李適之祭
西岳太子賓客王丘祭北岳國子祭酒張說祭南岳其
四瀆四海四鎮及諸名山靈跡等各委所由州長官祭
仍令所司即擇日奏聞務於黼潔之禮以致精明之德

冀申誠懇如朕預焉道釋二門玄通衆妙濟時育物皆有明徵是所依憑豈忘尊奉其天下寺觀並令量修功德用濟三聖之教以叶百靈之心宜嗣虛懷各陳至敬者也

開元二十五年十月

升壇入廟行事官先去劍佩及履勅

勅精意曰禋吉蠲為享苟乖此義何以降神如聞比來祭官及監祭使等雖受齋戒殊乏虔潔如在之誠豈其然歟又虛心好靜神聽無聲倘致喧煩尤非致敬自今

以後升壇入廟行事官並去劍佩及履咸宜勉勵仍遮相糾察如或因循當別有處分

天寶元年南郊制

神之降休禮無不答永言禋祀必在躬親朕粵自君臨載弘道教崇清淨之化暢玄元之風庶乎澤及蒼生時臻壽域積以歲月未嘗懈怠豈謂休徵感通烈祖降見乃昭靈命是錫寶符因而求之應言而獲亦既至止果獲殊徵諒惟秘詞不可詳說然邦家大慶何以過焉是知神

仙所緘造化同體爰初有待經韞積而多時潛應改元若符契之相合景福攸介祇畏良深而羣官宗室抗疏於外元良諸子屢請於中逮夫緇黃兼彼耆耄懇誠不已前後相仍願加天寶之名用益開元之號顧惟菲薄曷以當之然則玄貺在乎欽承人心難以稱拒順天從衆議叶至公敬依所請實用多愧斯蓋上玄厚載爰及百神享佑効靈通於睿祖幽贊惟新之歷克彰永代之祥宜遵祀典式陳昭報可以來月十五日禘玄元皇帝廟

十八日享太廟二十日有事於南郊宜令中書門下典禮官等即詳定禮儀具錄奏聞應緣行事及檢校官等各委有司不須別差人執當其北郊宜差公卿擇日祭五嶽四瀆及名山大川各令所在長官備禮陳祭務申誠敬副朕意焉

每載四孟合祭天地詔

皇天之典聿循於百代郊祭之義允屬於三靈聖人既因時以制宜王者必緣情以革禮朕丕承寶運肅遵明

裡曷嘗不克已齋心虔恭夙夜猶慮蕩章或闕誠敬未
孚有一於此良深祇畏且尊莫大於天地祀莫大於祖
宗嚴配昭升豈宜異數令蒸嘗之獻不著於常式南北
之郊未展於時享樂盛且畧對越何申自今以後每載
四時孟月先擇吉日祭上帝其皇地祇合祭以次日祭
九宮壇皆令宰臣行禮務崇蠲潔稱朕意焉祭神如在
傳諸古訓以多為貴著有禮經脾胃之儀蓋昔賢之尚
質甘旨之品亦孝思之盡誠既切因心方資爰禮其已

後享太廟宜料每室加常食一牙盤仍令所司務盡豐
潔發生振蟄雷為其始畫卦陳象成物效靈氣實本於
陰陽功乃施於動植今雨師風伯久列常祀唯此震霆
未登羣望其已後每祀雨師宜雷神同祭朕承宗廟之
福為人神之主事有未暢義在得中庶寅畏之誠上達
於郊廟祈禳之典載收於闕遺凡在有司各揚所職倍
宜恭肅以叶靈心

天寶五載南郊詔

孝享宗廟所以達思誠也格於神祇所以崇嚴敬也則
祈穀上帝春祠先王永惟因心敢忘如在朕承累聖
之不業膺上穹之景祐聿循柴燎虔奉蒸嘗慮儻末豐
馨香莫達頃以詳諸舊典創以新儀清廟犧牲特加於
常餼昊天冬祭重增以時享庶乎展敬之勤克叶殷薦
之義况履茲霜露載感惟深瞻彼郊壇有懷昭事今禮
崇昭報諒期乎達誠教在率先必貴乎親奠宜以來
載正月朕親謁太廟便於南郊合祭仍令中書門下

即與禮官詳定儀注擇日奏聞興言拜獻先深祇感凡百有司各供爾職

元年建子月祭圓丘詔

皇王俯仰應協於靈祇典禮廢興式存於禋告蓋重成命以崇祇肅朕獲嗣鴻猷敢忘虔敬頃以三代正朔所尚不同百王徽號無聞異稱顧茲薄德思創常規爰因行慶之日將務惟新之典而建元立則制命膺符受於天地祖宗申於百辟卿士今既循諸古法讓彼虛名革

故之宜以宣於臣下昭報之道未展於郊廟因時備禮
擇日陳誠克明恭已之心庶降庇人之福至誠斯感其
在茲乎宜取今月二十八日朝獻太清宮二十九日享
太廟光獻廟來月一日祭圓丘及太一壇

百官議大禮期日勅

勅朕自遷越旋於京師將欲請罪祖宗告謝天地所司
選日行有期矣議者多以大盜之後人勞靡居懼愆歲
功請俟農隙若俯順羣議則私懷不安將祇率舊章又

疲此重擾夙夜憂惕罔知所裁宜令常叅官集議中書門下詳其折衷聞奏

罷告謝郊廟勅

朕一經遷越久曠禮儀不唯霜露之感實貽失墜之憂賴先澤在人上帝臨我克平大難載復舊京方欲展禮郊丘請罪宗廟而乃祖宗股肱卿士詢謀異同明孝敬之大端陳古今之正議三省章表深體乃誠以義制心允從衆請予之不德愧歎良深其來年告謝郊廟百寮

請俟後期者可之其元日御含元殿准式

以旱停南郊勅

今年郊畿亢旱自夏訖冬以陰陽之久有錯違懼災盛
之或耒豐潔祖宗上帝鑒臨左右德馨未達惕焉在懷改
龜薦誠以俟祥歲酌諸典禮亦謂合宜其來年南郊宜停

太和
年

唐大詔令集卷六十七